



27. oktober 2010

Inatsisartut suleriaasiat § 36 immikkoortoq 1 naapertorlugu Naalackersuisunut imaattumik apeqquteqarniarpunga.

Naalackersuisunut Apeqqut:

Naalackersuisut aatsitassarsiornermi inatsit malillugu ukiut tamaasa Inatsisartunut aatsitassarsiornermut nalunaarummik saqqummiussisarniarpat?

(Inatsisartunut ilaasortaq Aleqa Hammond, Siumut)

Tungavilersuut:

Aatsitassat pillugit ingerlatallu tamatumunnga pingaarutillit pillugit inatsisartut inatsisaat nr. 7, 7. december 2009-imeersumi (aatsitassanut ikummatissanullu inatsit) § 4-mi allassimavoq akuersissutit tunniunneqarsimasut, akuersissutinik qinnuteqaatit, akuersissutinillu neqerooruteqartitsinissat pereersimasut pilersaarutigineqartullu pillugit Naalackersuisut ukiut tamaasa nassuiaammik Inatsisartunut saqqummiussisassasut.

§ 4-mut nassuiaammi allassimavoq "Aalajangersakkami aalajangerneqarpoq inatsit malillugu ingerlatat assigisaallu pillugit ataatsimiititaliamut Inatsisartut pilersitaanut ilisimatitsissuteqartarnissaq Naalackersuisut pisussaaffigaa. Naatsorsuutigineqarpoq aatsitassarsiorneq Kalaallit Nunaannut aningaasarsiornikkut inuussutissarsiornikkullu pingaaruteqalerallu innassasoq, namminersorlutillu oqartussat aatsitassarsiornerup tiguneranut atatillugu pissusissamisoorpoq Inatsisartut ataatsimiititaliamik immikkut ittumik pilersitsinissaat, sammisaqarfimmik naalackersuinikkut paasisimasani nakkutilliinernillu isumaginnittussamik. Siunnersuummi siunertaanngilaq aatsitassanut ataatsimiititaliap immikkut ittup pilersinnerani siunissami aalajangertarnissaat Inatsisartut inangiillutik akuliuttassasut imaluunniit Inatsisartut ataatsimiititaliaasa allat akornanni akisussaaffiisa suliffissaasalu agguataartarnerat pillugu."

Aammalu § 4 Imm. 2-mut nassuiaammi allassimavoq "Aalajangersakkami aalajangerneqarpoq Naalackersuisut ukiut tamaasa Inatsit malillugu ingerlatat pillugit nalunaarusiamik suliarinnittassasut tamanullu saqqummiullugu. Siunertarineqarpoq, nassuiaat ataatsimut isigalugu siunnersuut manna malillugu ingerlatat pillugit Naalackersuisut Inatsisartunut innuttanullu tamanut paasisutissiissutissatut atuutissasoq.

Nassuiaat Naalackersuisut Inatsisartunut ilaasortanut nassiuttassavaat, naatsorsuutigineqarporlu taanna Naalackersuisut nittartagaatigut tamanut saqqummiunneqartassasoq."

Suli Inatsisartut 2010-mi aatsitassat pillugit nalunaarummik saqqumiivigineqanngillat.

Apeqqutiga ullut sulliviusut qulit qaangiutsinnagit akineqassasoq kissaatigaara.

Aleqa Hammond

Siumut